

Vil fallen schwär in dise süht
Den doch dar vß gat wenig frucht/
Für golt man Kupfer yetz zū rüst
Müsdreck man vnder pfeffer myst
Man kan das belzwerck alles verben
Vnd düt es vff das schlechtest gerben
Das es beheltt gar wenig hor
Wann mans kum treit eyn veirtel jor/
Zysmüß die geben bysem vil
Des gstanck mā schmeckt eyn halbe myl
Die fulen hering man vermyscht
Das man verkoufft sie gar für fr ysch
All gassen sint fürkouffer voll
Gremperwerck triben / schmeckt gar wol
Fyrn / vnd nüw / man vermāckeln kan
Mit Btrügniß gat vmb yederman
Keyn Kouffmanschatz stat inn sym werdt
Jeder mit falsch vertriben bgert
Das er syns kroms mög kumē ab
Ob es Gall / vberbeyn / joch hab
Sellig on zwiffel ist der man
Der sich vor falsch yetz hütten kan
Das kyndt sin eltern btrugt vnd mog
Der vatter hatt keynr syppschafft frog
Der würt den gast / der gast den würt
falsch / vntruw / bschysß würt gātz gspürt
Das ist dem endkrist güt fürkouff
Der würt inn valsch dün / all syn kouff
Dan was er gdencket / heyßt / düt / vn lert
Würt nüt dann valsch / vntruw / verkert

